

Sa mas di: **Musica Folklorico**

Nos musica folklorico ta uno hopi rico y interesante. Awendia no ta hopi mucha sa bail'e, pero antes ta esey so tabata wordo baila. Ta pica cu e interes den siñamento di bailenan folklorico ta birando menos. Pero e historia, origen y custumbernan ta keda presente keto bai.

Den e musica folklorico por ehempel tin 5 tipo:

1. Wals: E wals semper ta wordo baila durante di bruidnan, ricibimentonan of fiestanan celebrando 15 aña di un mucha. Tambe durante fiestanan celebrando un of otro aniversario. E wals ta original di Europa, pero cu tempo a desaroya y haya su propio estilo tipico di nos.

2. Mazurka: E tipo di musica aki ta wordo toca mayoria biaha na fiestanan di gala cu e 'shonnan' tabata organisa e temponan aya.

3. Dansa: E musica aki ta wordo toca solamente ora di celebracion di un bon cosecha of un otro tipo di celebracion crioyo.

4. Tumba y 5. Tambu: E ritmonan aki tabata un gozo entre esnan presente na un of otro celebracion. E tambu por ehempel tabata un musica y un baile cu e catibonan (slaven) tabata pasa nan rato cun'e. Nan tabata usa nan mesun materialnan di trabao pa toca y traha musica. Un di e cosnan cu ainda nan sa usa ta e chapi.

No ta solamente e tipo di musica so ta importante, sino tambe e custumbernan rond di nos musica. Tin un piesa specifico tambe pa cierto celebracionnan tipico di Aruba, por ehempel e piesa toca durante e fiesta di San Juan (of Dera Gai), tambe e Dande cu ta ser scucha solamente durante e comienso di cada aña. Nan ta piesanan cu te awe ainda bo ta tende, y ta keto bai parti di nos identidad, algo cu ta di nos so, y no ta wordo comparti cu Corsow of Boneiro tampoco. Pero si tin cambio, pasobra tuma un Dande por ehempel, cu ta pasa di cas pa cas pa yama e aña y un bon bini, y trece bendicion pa e famia cu tin den e cas. E ultimo e ta haci keto bai, pero awor bo mester contrata un grupo di Dande pa



pasa na bo cas, y tin algun cu ta cobra pa nan bini, mas loke nan ta haya den sombre.

Pues aki bo ta wak, cu cada tipo di musica tabata wordo toca pa un sorto di ocasion so. Algo cu kisas bo no tabata sa.

Aruba ta comparti e mesun tipo di musica cu Corsow y Boneiro, cada isla cu nan mesun preferencianan y sistema di baila, pero cu un cos den comun: e ta dushi, sigur cu si, y mester percura pa tene bon na halto!





Chabalito

Number 6 - Año XIII



3.00
(incl. B.B.O.)

ich 2/11